

Miguel Mansur partido Accion21 tocante discusion cu otro candidatonan den mesun partido:
“Di 14 candidato, cada un tin e bienestar di Aruba na pecho”

Durante un entrevista exclusivo pa Bon Dia Aruba, e lider di partido Accion21 a sigura cu den tur partido ta existi discusionnan y cu su persona lo huramenta otro siman, e resto ta speculacion.

Primeramente, Mansur a gradici tur votado cu dia 25 di juni a deposita su voto tanto pa su persona cu a haya 2.019 voto como pa e partido en general cu a logra 3.410 voto.

Di loke ta trata e rumor cu tin problemanan den seno di partido mes cu diahuebs ultimo a keda conoci pa comunidad door di un articulo cu un otro medio di comunicacion local a publica, Mansur a trece dilanti cu “esey ta veridico, den tur partido tin discusionnan, vooral despues di eleccion cu e votonan personal y semper emocion ta halto”, el a expresa.

Partido Accion21 a participa den eleccionnan ultimo cu 14

candidato, cada un di nan tin e bienestar di Aruba na pecho manera el a declara y probablemente e vision di progreso di cada un por varia, por ta tin diferente opinion di con por hiba esaki dilanti pero, como partido nan ta scuchando tur hende “a mi como lider tin e deber di tin e partido uni y den e proceso ey nos ta, no lo ta constructivo haci comentarionan tocante discusionnan pasobra esey ta loke nos tin te awor den partido, discusionnan interno, manera den tur partido, pero esun di nos a yega na noticianan” el a menciona.

Asina mes, Mansur a informa cu den e partido mes no a cuminsa ningun discusion pa formacion y “e berdad ta cu no mester di esey, tin hopi manera di forma e proximo gobierno sin Accion21 y nos no tin e yabi al menos cu por ehemplo, lo tin un re-conteo y e resultado lo ta 8-8-2-1, nos kier crea e base mas amplio posibel pa asina imple-

menta e acuerdo cu Hulanda y hiba Aruba bay dilanti”, Mansur a splica.

Manera a keda conoci, tin dos candidato den partido cu segun no ta di acuerdo cu e situacion y di esaki el a sigura cu ayera diahuebs el a reuni cu un di nan na unda te ainda nan ta dialoga y cu e partido ta sigui enfoca riba e progreso y riba nan plannan.

Daphne Lejuez candidato number dos di e partido Accion21 cu a haya 500 voto individual, a haci un publicacion riba su Facebook cu a crea cierto discusion den comunidad y cu pa algun personanan por a wordo interpreta cu tin problemanan cu e lider di partido Mansur, pa cu esaki, el a sigura na Bon Dia Aruba cu e no ta considera e publicacion como algo personal pa su persona, “a mi no ta asumi cu tur cos ta personal pa mi, mi no sa si su post ta dirigi na mi persona, loke si mi por bisa ta cu nos ta 14



candidato den partido y mi ta kere esey ta cu un mayoria di nan tin pleno confiansa den mi liderazgo”.

Di mesun manera, Mansur a señala cu su persona por tin discusionnan cu Lejuez di kico ta e miho manera pa bay dilanti pero “esey ta discusionnan personal, na final nos tur ta comprometi na prin-

cipionan di partido”, el a expresa.

Pa finalisa, el a enfatisa cu nan como partido no a cuminsa ningun combersacion pa formacion, “nan no mester di nos pa formacion y realmente aworaki un asiento nos tin cu a mi lo huramenta otro siman y e resto ta un speculacion”, el a finalisa.